

Date – 24/08/2025

Time - 18:30 Hrs

HEADLINES (EVENING)

1. Pi Runliani (kum 80) thattu ni ngei a hriat Vanlalmuanchhana kum 21 chu nimin tlai khan man a ni.
2. Tunkar Nilaini atanga tan tur Mizoram state legislative assembly fur thutkhawmah kutdawh khapna dan putluh a ni dawn.
3. MZP chuan New Delhi-a UPSC Coaching a kal tûr mi pahnih an thlang chhuak.
4. Prime Minister Narendra Modi chuan naktuk hian Ahmedabad ah cheng vaibelchhe 5,400 senga siam hmasawna kawng hrang hrang te a hawng dawn.

<><><>

MURDER CASE BREAKTHROUGH

Kar kalta Thawhlehi chhun pachanga Aizawl Maubaw k veng a chenna in kum 80 a upa Pi Runliani thattu ni ngei a hriat Vanlalmuanchhana kum 21 chu nimin tlai khan man a ni.

Aizawl south sub divisional police officer (SDPO) Pu Stephan Lalremthara hnen atanga Akashvani Aizawl-in thu a dawn danin Maubaw, Bethel Veng a cheng Vanlalmuanchhana hi a hma lama rinhlel an hren mi 7-te zinga tel lo a ni a. Nimina Pi Runliani pawisa dahna bag hmuhchhuah atanga chhui zui a an man a ni a. Cheng 2,000 bawr vel a bag-a awm a lak hnu-ah a hman bang chu Police-in an hmu let a. Nimin tlai thimhlim khan manin a inpuan hnu-ah court-ah hruai-in nizan dar 9 hnu lam khan Central Jail-a dahluh a ni a. Tualthattu ni a rinhlel Vanlalmuanchhana hi Pi Runliani te chenna in atanga hla lo te a awm a nih thu Police-te chuan an sawi a. Tualthahna hmuna pheikhaw hniak atangin a chappal bun nena hmehbelin an man a, Police hma-ah a inpuang ta niin SDPO chuan a sawi a ni.

Pi Runliani hi a hrawka zai a nih bakah a nghawngah chemte a vihna hnuhma a awm a. Thisen baw nuaih bulah a ruang hi hmuh a ni a. A thih thu hi Mizoram pumah darh nghalin mipui thinrimna a sosang hle a. MHIP general headquarters leh a chenna Maubaw khawtlang bakah hetiang hmeichhia-ah pawh kum upa lam laka tharum thawhna demna thawm hi a ring hle a. Police te'n ngawrh taka an chhui hnu-ah a thattu ni ngei a hriat hi an man ta a, a thah ngei thu a inpuang niin Police chuan an sawi a ni.

Maubaw veng local council leh tlawmngai pawl hrang hrangte chuan nimin khan thuchhuah intawm siamin Pi Runliani thattu ni ngei a hriat man a nih chungchangah Police te chungah lawmthu an sawi a. Dan anga na taka hrem an phut bakah an veng a awmzui an remtih loh thu an puang baw a ni.

BIOMETRIC ENROLMENT

July thla tawp atanga tan, Myanmar raltlan zinga mi 4,741-te mit-naute leh kut ze thla chu lak a ni tawh.

Home department hotute hnen atanga thu dawn danin biometric enrolment hna hi duh angin district hrang hrangah kalpui chak theih a ni lova, an harsatna tawh lian ber chu 'Foreigners Identification Portal & Biometric Enrolment' (FIP&BE) software hmanga hna an thawhna khawl hman chianguang lo leh internet signal tha tawk lote a ni a. Hei hian an hna a tithuanawp nasa hle niin district hrang hrang official-te chuan an sawi a. Relief camp-a awmte a hlawma endik an awlsam rualin an fate hmun danga lehkhazira awm an lo awm ve baw avangin an biometric data lak kim a harsa an tih bakah chhungte leh thiante belte bakah mi in luaha awm hmun karkik tak taka awmte chu khawtlang hruaitute tanpuina an hmu chungin hun a duh hle niin an sawi baw.

Ministry of home affairs duhdana biometric enrolment chauh kalpui tura ngaih a nih lai-in biographic data pawh lak khawm nghal a ni a. Raltlan hming, nu leh pa, a lokalna khua, Myanmar a a awm lai leh Mizoramah enge a thawh tihte lak zel a ni. Tun hma khan mimal chanchin chhinchhiah hna hi kalpui chhuah vek a ni tawh a, temporary identity card pawh pek chhuah deuh vek an ni tawh chungin an dinhmun hi a danglam

reng avangin mimal chanchin chhinchhiah hi thar thawh leh a nih thu home department hotute chuan an sawi a ni.

Myanmar raltlan hi mi 32,000 chuang Mizoramah an awm ni a ngaih a ni a. Bangladesh Chittagong Hill Tracts atanga raltlan hi mi 3,000 tling lo deuh an awma ngaih a ni a. Lawngtlai district-ah Bangladesh raltlan 2,000 chuang an awm a, Thenzawl khawpui-ah 299 awmin Lunglei district-ah Khawmawi khua-ah mi 63 an awm mek bawk a ni.

<><><>

ASSEMBLY

Tunkar Nilaini atanga tan tur Mizoram state legislative assembly fur thutkhawm atan dan thar siam tur 2 leh dan dinglai siamthat tur pakhat a lut tawh.

Assembly secretariat atanga thudawn danin sorkar dan siam tur thar hi urban development & poverty alleviation (UD&PA) department atangin The Mizoram Local Body Ombudsman Bill 2025 leh social welfare department atangin kutdawh khapna dan siam tur duan - The Mizoram Prohibition of Beggary Bill, 2025 te chu thehluh a ni tawh a. Hei bakah hian land revenue & settlement (LR&S) department atangin dan ding lai siamthat rawtna The Mizoram Land Revenue (Amendment) Bill, 2025 chu an dawng tawh bawk. Official resolution pakhat a lut tawh a, hei hi environment, forests & climate change (EF&CC) department atanga lut a ni. Hei bakah hian assembly inkhawma tawngka a chhan chi (starred question) 350 leh ziaka chhan chi (unstarred question) 124 a lut tawh bawk a ni.

Tun tum assembly fur inkhawm hi Assembly kal mek 9-na a inkhawm vawi 5-na tur a ni dawn a. Assembly speaker Pu Lalbiakzama hova business advisory committee (BAC) thukhawm chuan inkhawm hi ni 2 chhung ni turin an rel a. August ni 27 hian MLA ni lai thi ta Pu Lalrintluanga Sailo sunna hun hman a ni ang.

<><><>

IIMC

Tun thla tir atanga session thar tanah Indian Institute of Mass Communication (IIMC), North East Regional Campus, Aizawlah zirlai 34 an inziak lut a, an vaiin Mizoram pawn atanga rawn lut vek an ni.

IIMC Aizawl-ah hian programme pahnih - kum khat zir, Post Graduate Diploma in English Journalism leh kum hnih zir, MA in New Media Communication te a awm a. Kuminah hian PG Diploma in English Journalism-ah zirlai 20 leh MA in New Media Communication-ah zirlai 14 an lut a. An vai hian hmarchhak state thenkhat leh India ram hmar lam state hrang hrang atanga lokal an ni a. Heng zirlai te hi Common University Entrance Test (CUET) paltlanga lut vek an ni.

IIMC hi Ministry of Information & Broadcasting hnuaia India rama inbiakpawhna (communication) leh media lam zirna hmunpui niin India ram pumah a hmunpui New Delhi bakah Aizawl, Amravati (Maharashtra), Dhenkanal (Odisha), Jammu (J&K), and Kottayam (Kerala)-ah te regional campus a awm a. Hmarchhak tana campus duan chu Aizawl-a Mizoram University campus-ah a awm a. A din tirh atangin Mizoram zirlaiten an bawh vak lo a, seat awm ang te Mizoram pawn atangin zirlaiten CUET paltlangin an rawn hnawhkhat tlangpui thin a ni.

<><><>

MZP

Mizo Zirlai Pawl (MZP) chuan New Delhi-a UPSC Coaching a kal tûr mi pahnih an thlang chhuak.

MZP chuan Mizo thalaite UPSC Combined Competitive Exam a, a tam thei ang ber an tlin theih nan hma an la thin tih sawiin chumi hmalâkna kal zêlah chuan MZP chuan hun hmasa lamah UPSC Coaching, New Delhi-a kal tur hian mi pahnih a lo sponsor tawh tih an sawi a. North East Students’ Organisation (NESO) chuan hmarchhak state-ah UPSC tling an tlêm tual tual avângin kumin 2025 hian North East State tin atangin mi pahnih a sponsor dâwn tih sawiin MZP hruaitute chuan MZP leh NESO tangkawp chuan Mizoram atanga sponsor tûr hi Written Examination leh Personal Interview hmangin a thlan dawn tu leh heng mi pahnih te hi an Coaching kalna tur zawng zawng hi NESO leh MZP chuan a tumsak dâwn bakah an awmna tur a ngaihtuahsak dawn thu leh thlatin Stipend an dawn dawn thu an sawi bawk a ni.

Mizo Zirlai Pawl-in tun thla Ni 21-a Written Examination a buatsaih leh Ni 22 August, 2025-a Personal Interview hmanga North East Students' Organisation (NESO) in a sponsor tûr UPSC COACHING, Next IAS Institute, New Delhi-a Mizoram atanga kal tur mi pahnih a recommend-te hi Remruatfela leh Obadia Zorinpuia te an ni a. Reserved panel-ah mi 2 dah bawkin thlan chhuahte hian thla thar ni 1 atangin class an zawm dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

APNA GHAR

Aizawl Zemabawk venga Cancer Hospital-a inenkawl mek te Aizawl khawpui pawn km 20 piah lam mi te tana a thlawn veka awmna tur India rama damdawi siam chhuaktu lian tak INTAS Foundation-in a din ‘Apna ghar’ chu damlo te'n an hmang tangkai hle.

Zemabawk Apna Ghar ah hian pindan 8, mimal riahna pindan 2, mi pahnih awm theihna pindan 5 leh mi pathum awm theihna pindan 1 a awm a. Damlo pakhat hian awmpui pakhat theuh an nei a. He In ah hian pindan, mut puan, ei leh in pek vek an nih bakah damlo leh awmpuite tan wifi connection pek an ni a. TV bakah lehkhahu chhiar tur an dah bawk. Thla khat chhungin vawi li activity neiin an inhmukhawm thin a, damlo te leh awmpuite tana tangkai tur inhrilhna leh inkawmhona hun hman thin a ni.

Apna Ghar-ah hian a hotu ber Project Assistant hovin Counsellor 2, venghimtu 3, inchhung vawngtu leh chawchhum 2, an vaiin 8 an awm a. Hetianga cancer veite tana engkim a thlawn veka awm theihna INTAS foundation kaltlanga Mizoramin a neih hi Aizawl khaw pawn District hrang hrang miten an hlutin room pawh a full hneh hle a ni. INTAS foundation hian India ram khawpui lian deuh deuh Cancer hospital awmna bulah Apna Ghar (kan in) hi an CSR hmangin hmun 41-ah an din a. Ram bung hrang hranga thenin hmarchhak pumpui hi Kolkata atangin enkawl a. Mizoram leh hmun thenkhat hi Guwahati atanga enkawl a ni thung a, India ram pumpui INTAS foundation hi Gujarat-ah hmunpui neiin an awm a ni.

<><><>

MPCC SLAMS GOVT

MPCC Sr. Vice President Pu Lalnunmawia Chuaungo chuan ZPM sorkar chuan kum 2 em pawh an la sorkar lo chungin mipuite beisei an phak loh thu leh an lakah mipuite an beidawn hle tawh thu a sawi.

Congress Bhavan, Aizawla an party in political session an hmanna-ah he thu hi sawiin Pu Lalnunmawia Chuaungo chuan kumin Independence Day lawmna a Chief Minister thusawi a an sorkar chuan leiba tlingkhawm cheng vaibelchhe 13,584 leh nuai 80 neiin bul an tan thu a sawi chu nikuma anmahni puala Budget pum an pharh hmasak bera thu a sawia leiba tlingkhawm an rochun cheng vaibelchhe 12,966 leh nuai 93 ni a a sawi nen a inan loh thu leh rin tur ber hriat hleih theih a nih loh thu a sawi a. MPCC Sr. Vice Preident chuan Chief Minister thusawi-ah tho nikum tangka kum bulah sumfai hman bang cheng vbc 520 leh nuai 65 an nei tih a sawi chu sum awm si an hman loh, an thawh that tawh loh vang a nih thu a sawi a. Tlem azawng hman bang te chu awm mahse cheng Vaibelchhe 520 chuang zet Financial Year chhunga an hmang hman lo a nih chuan hna an thawk tha lo tihna a nih thu leh inchhuanna tur ni lovin mahni mawng himna, thil zahthlak lam a nih thu a sawi a ni.

Pu Lalnunmawia Chuaungo chuan kum 2023-24 tangka kuma SASCI chungchanga sorkarin an sawi lar em emah pawh Mizoram state chanpual liau liau tur 1st Installment sorkar laipuiin an rawn pek te chu a hunah lo hmangin, Utilization Certificate lo pe thei ni se chu cheng nuai 23,300 chuang chu Mizoram hmasawn na'n an hmang tur a ni a ti a. Sum an enkawl thiam loh avangin hnathawktu tur Implementing Agency te hnenah sum an pe chhuak thei lova, hna an thawk si lova, Central sawrkar hnenah utilization certificate (UC) an pek theih si loh avangin cheng nuai 23,300 chuang Mizoramin a chan ringawt mai tih a sawi a ni.

MPCC Sr Vice President chuan sorkarna fawng chelh turin an party an inbuatsaih a, theihtawp an chhuah chho mek tih a sawi a. Mizote tih dan phung dik tak fatute'n mipui ruai an hlui hmasa thin ang chu an kalphung atan a pawimawh tih sawiin chutiang tur chuan an party pawhin rilru an buatsaih a pawimawh thu a sawi a. An party chuan an tih hlawhtlin theih ngei tur ni a an hriat te chauh mipuite hnenah manifesto te siamin an zuar dawn tih a sawi bawk a ni.

<><><>

LUNGLEI CRIME

Kumin chhung hian thubuai hrang hrangah Lunglei district-ah sorkar tan thubuai 613 khawih zingah hian thubuai 410 ah sorkar lam chakin thubuai 34-ah an chak lo.

He thu hi Lunglei Police te nen dan thar an zirhona-ah Lunglei District Public Prosecutor Pu Malsawmdawngliana’n a sawi a. Lunglei District Court-ah hian Public Prosecutor (PP)-1 leh Additional Public Prosecutor (PP) -7 awmin sorkar tana ukil hi an vaiin 8 an awm a. An zingah hian Addl. PP Pi C. Lalmihriati chu sorkar tana thubuai khawih tam ber niin thubuai 247 a buaipuah thubuai 198-ah hnehna changin thubuai 34-ah a chaklo a ni.

Lunglei district SP Pu J. Lalmuankima chuan police in thubuai an neih dan leh thubuai chin fel loh awm chungchang sawiin thubuai chhuitu (case IO) te nen an dinhmun bakah an tan ho dan tur leh an hriat tur tul te inhrilhfiah hun an hman a ni.

<><><>

HM AMITSHAH

Union Home Minister Amit Shah chuan ni hnih awh All India Speakers Conference chu vawiin khan Delhi Assembly ah a hawng.

Home Minister chuan zalenna chu a pawimawh ang bawkin zalenna kan hmuh hnu a ram leh hnam zalen tak a kal thiam chu apawimawh em em a ni a ti a. He hunah hian Parliamentary Affairs Minister Kiren Rijiju pawhin thu sawiin ni 2 awh tur Conference chu thil thar tha zawk zir nan a tangkai hle a ni a ti.

He conference ah hian State Legislative Assembly a speaker te leh Deputy Speaker te bakah State Legislative Council a Chairman leh Deputy Chairman te an tel a ni.

<><><>

PM

Prime Minister Narendra Modi chuan naktukah hian ni 2 cham turin Gujarat a tlawh dawn a, a ni hmasa ber ah Ahmedabad ah cheng vaibelchhe 5400 senga siam hmasawнна kawng hrang hrang te a hawng tel dawn a ni.

Hawнна hun hman zawhah thu a sawi ang a, a ni hnihnaah Prime Minister hian Ahmedabad a Hansalpur ah project hrang hrang a hawng dawn bawk a ni. Prime Minister hian Gujarat a tlawh chhung hian Railway project hrang hrang cheng vaibelchhe 1400 senna chu ram mipuite hman theih turin a hawng dawn a.

Ahmedabad-a Ahmedabad-Mehsana-Palanpur paltlang tur 6 lane kawng siamna tur leh Ahmedabad-Viramgam kawng chung a rel kalna tur lei sakna tur lungphum a phum dawn bawk a ni.

<><><>